

Thursday, November 6, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

MNF LEGAL BOARD

Chief Minister Pu Lalduhoma'n Silsury khuaa Dampa bial by election atana a campaign-naah hnam leh hnam inkara inhuatna thlen thei thu a sawi avang leh model code of conduct a bawhchhiat avangin vawiin khan MNF Legal Board in CEO hnenah thubuai an thehlut.

Vawiina Aizawl Press Club ah thuthar thehdarhtute an kawmnaah MNF Legal Board Member, Pu Saihmingliana Sailo chuan tun thla November ni 1-a Chief Minister Pu Lalduhoma'n ZPM Party tana Silsury khuaa a campaign-naah MCC leh Dan dinglaite nasa takin a bawhchhia tih sawiin, Chief Minister chuan Mizoram hruaitu hmasaten Mizo mipuite leh Chakma inkarah inhuatna chi an lo tuh a, hruaitu hmasaten Chakma huat dan min lo zirtir tawh thin a ni" tih a sawi a, a thusawi hian Election kaihhnawiha dan dinglai Representation of Peoples Act.1951 hnuaiah "Party tumahin hnam leh hnam emaw chi leh chi emaw, sakhuana emaw, inkara in huatna emaw, inghirnghona lam kaihhnawih engmah hmalakna lam hawi an ti emaw, an sawi emaw tur a ni lo", tih chu chiang takin a bawhchhia an ti a. Hei bakah hian hemi ni vek hian Chief Minister chuan mipuite chu an party candidate an vote loh chuan sorkar atanga hamthatna an hmuh tur hrekah a vau bakah hamthatna chi hrang hrangte tiamin Silsury kawng siamna tur cheng vbc 100 leh nuai 40 dah fel a nih tawh thu leh kawng tha siamsak an nih tur thu bakah, kawngpui, Border Trade, Chief Minister's Special Package, mirethei in sak tanpuina leh an mamawh dangte pek an ni dawn tih a sawi bawk a. Heng a thu sawite hian Election Commission of India in a duan, Model Code of Conduct Para VII 6 (a) & (c) te chiang takin a kalh a ni an ti a. MNF Legal Board chuan RP Act leh Model Code of Conduct a bawhchhiat avangin Chief Minister Pu Lalduhoma chu Representation of the People Act, 1951 Section 123 (3-A) in Corrupt Practices tia tarlan Section 125 anga - kum 3 thleng Lung In tantir leh pawisa chawitira hrem theih a ni an ti a, vawiin November ni 6 hian CEO hnenah hmala tura ngenna/complaint an thehlut tih an sawi a ni.



TERRITORIAL ARMY

Mizoram-a Territorial Army (Home & Hearth)-a tang tur lakna November ni 15 atanga November ni 25 inkara neih turah Mizo District hrang hrangah thlalaite ngawh takin an training mek.

Rajiv Gandhi Stadium, Aizawl-a Territorial Army lak turah hian Pre-Recruitment Training Aizawl leh Lunglei-ah Mizoram Youth Commission leh 166 Infantry Bn (TA) (Home & Heart), Assam chuan an buatsaih mek a, ngawrh taka training niin Territorial Army atan hian post 144 General Duty lak turah post 9 chu hmechhiate tana hauhsak a ni.

State Level Committee on Territorial Army Coordination and Establishment chairman Lt. Col. Clement Lalhmingthanga chuan October ni 27 khan PHQ Conference Hall-a chanchinbumite a kawmnaah Territorial Army hna lak tur chu Mizoram tana mellung pawimawh tak a ni tih sawiin, Mizo thalai hmeichhia leh mipa te chu ram leilung fa an nih anga mahni ram tana thawk a, venghim tura atana ke an pen ve theihna tur kawng hawnsak chu a tum ber pakhat a ni a ti a. Territorial Army atana lakte chuan Indian Army uniform nen chhuanawm taka ram tana hnathawkin, Indian Army te angin hlawh leh hamthatna bakah damdawia inenkawlina an dawng a ti a. An hnathawh that dan leh mawmawh dan a zirin Territorial Army te chu hun rei zawk atana chhawr theih leh hamthana hrang hrang Sorkar ruahman anga pek zui zel tur an ni a. An hnathawh tur hun chhung thawk zo te chu pension leh hmathamna hrang hrang an dawng thei dawn a. Tunah hian Sorkar Laipui chu 8th Central Pay Commission hmang turin a inbuatsaih mek a, hei hian Territorial Army te hlawh leh hamthatna pawh a belhchhah dawn a ni a ti a. Mizo thalai, hmeichhia leh mipa Territorial Army dil thei zawng zawng te chu hun tha bawhpel lo turin a chah a ni.



SOCIAL WELFARE MINISTER

Social Welfare Minister Pi Lalrinpuii’n vawiin khan hmeichhiate chung a hleilenna thlang thin tihbo kawnga hmalakna tur, Gender Based Violence Solve Project a hawng.

He project hi Aparajita leh J-PAL South Asia tangkawp hmalakna niin, Mizoramah chuan Mission Foundation Movement (MFM)-in a kalpui dawn a, vawiina hawnna hun Social Welfare Minister pisaa neih ah hian Pi Lalrinpuii chuan Mizorama hmeichhe chung a hleilenna pun nasatzia tarlangin, kum 2022-2023 chhung khan Women Helpline-ah case 3094 report a awm a, February 2025-ah chuan case 12750-ah a sang chho tih sawiin GBV tihbo lama hmalakna chu ramin a mamawh takzet tiin, hmeichhe dinhmun a that chuan chhungkua a thang a, khawtlang pawhin hma a sawn thin tih a sawi.

Minister chuan GBV Solve Project chuan hmeichhe chung a hleihlenna chungchang ringawt bitum lovin naupang (mipa leh hmeichhia) ten hemi chungchang zirtirna nasa tak an dawng dawn a ti a, hmeichhe chawmdawl ngaite eizawna tlak khawpa thiamthil zirtirna a keng tel dawn tih a sawi.



ILP

Sairang-a rel a rawn luh hnuah hnamdang an pun avangin MZP Branch, Phunchawng chuan nimin khan an vengchhung a hnam dang (Vai) hnathawka awm te ILP an check sak.

ILP Check runpui tum 2-na hi chhun zan zawmin neih a ni a, MZP Branch, Phunchawng hruaitute chuan, Sairang thlenga Rel a rawn luh atangin hnam dang (Vai) an rawn tam phah hlê tih sawiin ILP nei felfai lo an awm nuk avanga check an ni tih sawiin, nasa leh zuala dan lo a rawn lut hnamdang (vai) dapchhuah kawngah hma lak zel an tum thu an sawi.



CHAMPHAI VETY

Champhai District AH & Vety Department hnuaia thawktuten tunlai hian National Animal Disease Control Programme hnuaiah ran chi hrang hrang - Bawng, Lawi leh Sial te Ka leh Ke na lak atanga an him theihna turin khaw hrang hrangah damdawi an pe kual.

District AH & Vety Department hotute hnen atanga thu dawn danin Champhai District a khaw hrang hrang fang zo tawhin ran 400 chuang damdawi an pe tawh a, hetihlai hian natna laka ran venna tur Injection pek duh lo te pawh an awm. Naktuk, November ni 7 hian he Programme an kalpui mek hi an khar tawh dawn a ni.



PM MODI

Prime Minister Narendra Modi chuan Bihar Assembly inthlan thawh khatna a vote nei zawng zawng te chu an zalenna hmang thiam tur a chah in, vote thlak vek turin a sawm a, state chhung a thalai vote nei te abikin vawil vote thlawk tur te chu duhsakna leh lawmpuina hlan in an zalenna hmang thiam turin a chah bawk.

